

ՊԱՏՄԱՀՆԱԳԻՏԱԿԱՆ ԴԻՏՈՂՈՒԹՅՈՒՆՆԵՐ ԱՎԱՆԻ ՏԱՃԱՐԻ ՎԵՐԱԲԵՐՅԱԼ

(Երևանի հիմնադրման 2750-ամյակի առթիվ)

Պրոֆ. Կ. Գ. ՂԱՖԱԴԱՐՅԱՆ

Վերջին տասնամյակների ընթացքում Երևանն ընդարձակվելով իր մեջ ընդգրկեց նաև շրջապատի մի քանի գյուղերը՝ Նորքը, Նորադավիթը, Շենգավիթը, Չաբրախը, Քանաքեռը, Ավանը և ուրիշները, որոնցից շատերը նախկինում երբեք քաղաքի մաս չէին կազմել:

Ավանում կա մի նշանավոր տաճար, որը Երևանի միջնադարյան սակավաթիվ հուշարձանների շարքում իր անցյալով և ճարտարապետական ոճով առանձնահատուկ տեղ է զբաղում: Նրանով հայ ճարտարապետության մեջ հիմք դրվեց մի նոր ոճի, որն արագ թափով տարածվեց Հայաստանում, թափանցեց Վրաստան և իր կատարելության դադաթնակետին հասավ 618 թվականին Վաղարշապատում (էջմիածին) կառուցված Հռիփսիմե տաճարի հորինվածքի մեջ: Այդ ոճի շենքերից Վրաստանում նշանավոր դարձավ Մցխեթի ս. Խաչ եկեղեցին:

Ներկա հոգվածում կանգ ենք առնելու Ավանի տաճարի միայն կառուցման հանգամանքների և տարեթվի վրա, առանց շոշափելու նրա ճարտարապետական հորինվածքի ննդիրը:

* * *

V դարում Հայաստանը զրկվեց իր ազգային պետականությունից և Բյուզանդիան ու Պարսկաստանը տիրեցին նրան՝ իրար մեջ բաժանելով հրկիրը, բայց այդքանով չբավարարվեցին. Պարսկաստանը արևելյան կողմից, իսկ Բյուզանդիան արևմուտքից ամեն միջոց գործ դրին հայ ժողովրդին կրոնով ու դավանանքով ևս իրենց ենթարկելու համար:

Երբեմն բռնությամբ, երբեմն սիրաշահելով պարսիկներն աշխատում էին Հայաստանում արմատավորել իրենց դավանած մազդեական հեթանոսությունը, իսկ դրան հակառակ, Բյուզանդացիք ձգտում էին քրիստոնեություն դավանող հայ ժողովրդի միջից վերացնել կրոնական այն խտրությունը, որ դոյություն ուներ իրենց և հայերի միջև, որ հայերը արհեստականորեն ստեղծել էին տարրերվելու համար հույներից:

Վաղուց արդեն Բյուզանդիայի ղերիշխանության ներքո գտնվող Փոքր Հայքում հատուկ օրենքներ էին սահմանվել հայերին կազմալուծելու, իշխանական տների ուժը ջլատելու և ոչնչացնելու համար: Հայ ժողովուրդը ծայրահեղ դժվարին պայմաններում պայքարում էր երկու կողմերի դեմ, պահպանելու համար իր ինքնուրույնությունը:

Դարեր տևող այդ պայքարը խիստ սուր բնույթ էր ստացել VI դարի վերջին տասնամյակներին:

Պարսկաստանն Ավարայրի և նրան հետևող մյուս պատերազմներից հետո հաշտվել էր հայերի դավանած ազգային երանգ ունեցող քրիստոնեության հետ¹։ Նույնը չէր կարելի ասել Բյուզանդիայի մասին, որի կայսրերը ոչինչ չէին խնայում Հայաստանը քաղկեդոնական դարձնելու համար, իսկ քաղկեդոնականությունը, ինչպես ճիշտ էին հասկանում հայերը, մի ահավոր միջոց էր հայերին և մյուս ժողովուրդներին իրենց հետ միաձուլելու համար։

Միայն հայերի նկատմամբ չէր, որ բյուզանդական կայսրությունն այդ քաղաքականությունն էր վարում։ Նա հայերի հետ միևնույն դավանանք ունեցող վրացիների ու աղվանների մեջ ևս քաղկեդոնական սերմեր էր տարածում և աշխատում էր իրար բարեկամ այդ ժողովուրդներին իրարից բաժանել և այնպես տիրել նրանց։

Վերջ ի վերջո VII դարի սկզբներին, Կյուրոսի կաթողիկոսության ժամանակ, վրացիներն անցան հունական դավանանքի և հրաժարվեցին հայկական Լկեղեցուց, իսկ աղվանները մինչև վերջ կապված մնացին հայերին։

Հետաքրքիր են մեր մատենագիրների բազմաթիվ վկայությունները բյուզանդացիների բորբոքած կրոնական վեճերի վերաբերյալ, որոնք ավելի սուր բնույթ ստացան Մորիկ կայսեր ժամանակ (582—602), որը, ինչպես հայկական պատմիչներն են հաղորդում, ծագումով հայ էր և օշականցի²։

Սերբոսի պատմության մեջ քաղվածաբար մեջ բերած Մորիկ կայսեր մի նամակից իմանում ենք, որ հայերը ծանոթ էին բյուզանդական կայսրության բուն նպատակին՝ կաղմալուծել և ոչնչացնել հայերին և Հայաստանը տիրել առանց հայերի։

Մորիկ կայսրը, ըստ Սերբոսի, պարսից խոսքով արքային գրում է հայերի մասին. «Յայնմ ժամանակի թագաւորն յունաց Մաւրիկ հրամայէ գրել առ թագաւորն պարսից դիր ամբաստան վասն իշխանացն ամենայն Հայաստանեաց ևս զւարաց նոցա։ «Ազգ մի խոտոր և անհնազանդ են, ասէ, կան ի միջի մերում և պղտորեն։ Բայց եկ՝ ասէ, ես զիմս ժողովեմ և ի Թրակէ գումարեմ. և դու զքոյո ժողովէ և հրամայէ յԱրեւելս տանել։ Զի եթէ մեռանին թշնամիք մեռանին. և եթէ սպանանեն՝ զթշնամիս սպանանեն. և մեր կեցցուք խաղաղութեամբ։ Զի եթէ դոքա յերկրի իւրեանց լինիցին, մեզ հանդչել ոչ լինի»³։

Կրոնական վեճերն իր օգտին լուծելու նպատակով, Բյուզանդիան հաճախակի ժողովներ էր հրավիրում, որոնց մասնակցում էին բացի հայերից և հույներից նաև վրացիք, աղվանները, ասորիները։

Այդպիսի մի ժողով առաջին անգամ գումարել էին Կոստանդնուպոլսում, իսկ հետո այդ ժողովների կենտրոնը դարձրին Թեոդուպոլիսը, որ ավելի մոտ էր արևելյան քրիստոնեական պետությունների սահմաններին։ Թեոդուպոլսում

1 Հեթանոս Պարսկաստանը թեև ստիպված հայերին թույլ էր տվել քրիստոնյա մնալու, բայց նրբեք չէր հանդուրժում, երբ պարսիկներն էին քրիստոնյա դառնում. VI դարի կեսերին քրիստոնեություն ընդունած մի պարսիկի Դվինի մարզպանը սպանում է, իսկ հայոց կաթողիկոսը նրա դիակը թաղում է մայր եկեղեցու մոտ և վրան էլ կառուցում մի միանավ բազիլիկ տաճար։ Այդ պարսիկը, որ ստացել էր Հիզտրուզիտ անունը, հայ եկեղեցու ճանաչած վկաներից մեկն էր Տե'ս «Յովհաննու կաթողիկոսի Դրասխանակերտեցոյ պատմութիւն հայոց», Թիֆլիս, 1912, էջ 64։

2 «Պատմութիւն հայոց արարեալ Կիրակոսի վարդապետի Գանձակեցոյ», Թիֆլիս, 1909, էջ 47—50։ Նույնը, բայց համառոտ, տե'ս նաև «Ստեփանոսի Տարօնեցոյ Ասողկան՝ պատմութիւն տիեզերական», ՍՊԲ, 1885, էջ 141։

3 «Պատմութիւն Սերբոսի եպիսկոպոսի ի Հերակլին», Թիֆլիս, 1913, էջ 75։

գումարվեցին մի քանի ժողովներ, որոնց մեջ հուլյն հոգևորականները ջանում էին ապացուցել, որ իրենց և հայկական դավանանքի միջև էական տարբերություններ չկան և եղած տարբերությունները փոխադարձաբար վերացնելուց հետո կարելի է ընդունել մի դավանանք։

VI դարի վերջերին և VII-ի սկզբին տեղի ունեցող այդ վեճերի մասին Ատեփանոս Օրբելյանն իր պատմության մեջ գրում է. «Յայնմ ժամանակի բոր-բոքէր չարահնար աղանդն Քաղկեդոնի ի ձեռն բուռն թագաւորաց Յունաց և կամէր իբրև զքաղցկեղ ճարակել զաշխարհս Հայոց և զԱսորւոց ուղղափառաց, ևս առաւել ի թագաւորելն Մօրկայ։ Եւ դեսպանք և հրաւիրակք հռոմոց ետրէք ու՝ զաղաւթին յերթեկութեանց, բազում անգամ հրաման տային ժողովոյ, մի անգամ ի Կոստանդնուպօլիս կոչեցին և երիցս անգամ ի Թէոդուպօլիս. և դեմ յանդիման և ուժգին մեծամեծ հարցութործութիւնք լինէին. և էր յայնմ ժամանակի Հայաստանի դպրութիւնքս նորոգ և շէն. և յոյն լեզուին և դպրութեանն յոյժ հմուտք և տեղեակք։ Եւ որպէս հարցանեինն նորա՝ առաւել իմն պատասխանի լսէին»⁴։

Ինչպես տեսնում ենք, հայ հոգևորականները հունարեն լեզվի ու գրականության և կրոնական խնդիրների վերաբերյալ իրենց գիտությամբ ոչնչով չեն դիջել հուլյներին և դրանով իսկ, վեճերի ժամանակ, համարձակորեն պաշտպանել են իրենց դավանանքն ու ինքնուրույնությունը։

Բյուզանդական կայսրների հրավիրած ժողովները թեև իրենց նպատակին չէին հասնում և վիճելի հարցերը լուծում չէին ստանում, բայց դրանց միջոցով Բյուզանդիան կարողանում էր ձեռք բերել կողմնակիցներ, մանավանդ բյուզանդական մասում ապրող հայ կրոնավորների շրջանում։ Այդ վեճերը երկպառակություն էին առաջացնում նաև հայերի և վրացիների միջև։

Բյուզանդիան դեռևս վաղուց իր գաղտնի գործակալներն էր ուղարկում Հայաստան, որպեսզի կրոնավորների և ժողովրդի մեջ հայկական եկեղեցին բյուզանդականին միացնելու վերաբերյալ հող նախապատրաստեն և կողմնակիցներ հավաքագրեն։ Միշտ չէ, որ այդ գաղտնի գործակալների շար աշխատանքը թաքուն է մնացել հայ եկեղեցական գործիչների աչքից։

Ատեփանոս Օրբելյանը գրում է. «Յաւուրս տեառն Վրդանիսի՝ Սիւնեայ եպիսկոպոսի, եկին ոմանք նետորականք և Քաղկեդոնիկք, և խաբկանօր լնակեցան յաշխարհս Սիսական և յԱղվանս։ Ապա լուեալ տեառն Յովհաննիսի ընդոստոյց թղթովք և ծանոյց զվնասն որ ընդ յարդիւ ծածկեալ կայր։ յորմէ զարհուրեալ տեառն Վրդանիսի՝ հալածական արար ի վիճակէ իւրմէ. և մեծաւ նդովիւք փակեաց զի մի իշխեսցեն թողացուցանել ի սահմանս իւրեանց...»⁵։

Այս միջոցներով ևս չբավարարվեց Բյուզանդիան և որոշեց հայերին երկու մասի բաժանել և մի նոր կաթողիկոսություն հիմնել Հայաստանի բյուզանդական մասում, այն հույսով, որ շուտով հայերը բոլորը միասին կընդունեն նրա հոգևոր իշխանությունը։ Այդ նպատակով Հայաստանի բյուզանդական մասում ապրող հայերի համար կաթողիկոս ձեռնադրեցին Հովհան անունով մի հոգևորականի, որը հեղինակություն ուներ ժողովրդի աչքում և զարմանալի չէ, որ մեր մատենագիրները նրա անձի մասին գովասանքով են խոսում։ Դրասխա-

⁴ «Պատմութիւն նահանգին Սիսական արարեալ Ատեփաննոսի Օրբելեան արքեպիսկոպոսի Սիւնեաց», Թիֆլիս, 1910, էջ 101։

⁵ Նույն տեղում, էջ 97—98։

նակերտցին այս Հովհանին անվանում է «այր ճշմարիտ և արդար էր և առաքինի ի վարս, և բնաւ ոչինչ շեղեալ զկնի քաղկեդոնական աղանդիցն»⁶։

Նույն խոսքերով է բնորոշում Հովհան Բագարանցուն նաև Վարդանը, անվանելով նրան «Այր սուրբ, որ բնաւ չէր խոտորեալ յաղանդն յունաց»⁷։

Այսօր մեր ձեռքի տակ ունեցած կցկտուր և իրարամերժ տվյալներով դժվար է որոշել, թե Հովհան հակաթոռ ինքն անձնապես ի՞նչ տեսակետ է ունեցել VI դարում բոլորին հուզող կրոնական հոսանքների մասին, համակրե՞լ է քաղկեդոնական աղանդը թե ոչ, բայց քանի որ ինքը հույների հաստատած աթոռի գահակալն էր և, ինչպես հաղորդում են մեր պատմիչները, Մորիկ կայսեր նշանակած մարդը, այն էլ հակաթոռ, որ Դրասխանակերտցու ձիշտ բնորոշումով հայոց կաթողիկոսության աթոռը երկու հատվածի էր բաժանել և խախտել հայոց կրոնական միասնականությունն ու ինքնուրույնությունը, նրա պերր հույժ բացասական և վնասակար էր, մանավանդ, որ նա կաթողիկոս պարծալ այն ժամանակ, երբ 16 տարի արդեն գահակալել էր Մովսես Եղվարդեցին և դեռ շարունակում էր իր կաթողիկոսությունը Դվինի մայր աթոռում։

Դվինի աթոռն այդ ժամանակ մարզպանների և պարսից արքունիքի հատուկ հոգածության առարկան էր։ Ամեն տեսակ զիջումներ անում էին, որպեսզի նա Բյուզանդիայի ազդեցության տակ չընկնի։

Այս տեսակետով հետաքրքիր է Դրասխանակերտցու պատմածը Դվինի կաթողիկե եկեղեցու վերաշինության մասին 607 թ., Վրկանա նախկին մարզպան Սմբատ Բագրատունու ձեռքով։

Հովհաննես Դրասխանակերտցին գրում է, որ երբ Սմբատ Բագրատունին ուզեց փայտով ու աղյուսով շինված Դվինի մայր եկեղեցին քանդել և նրա փոխարեն «Սրբոյ կոփածոյ քարամբք, գեղեցկադիր շինուածիւ, կրով ձուլեալ ը մի» մի նոր և մեծ եկեղեցի կառուցել, Դվինի պարսից բերդապահը դիմում է խոսրով II-ին, որպեսզի վերջինս արգելի եկեղեցու շինությունը, պատճառաբանելով, որ եկեղեցին կարող է բերդի համար վնասակար լինել (հարձակվող թշնամին եկեղեցին կարող էր օգտագործել իբրև ամրություն՝ բերդը պաշարելու ժամանակ)։ խոսրովը ոչ միայն չի արգելում եկեղեցու կառուցումը, այլև հրաման է տալիս բերդը քանդելու և եկեղեցին նույն տեղում շինելու մասին⁸։

Պարսից արքան դրանով ոչ միայն Սմբատ Բագրատունուն էր պարտահատույց լինում նրա բազմաթիվ քաջագործությունների համար՝ պարսից ծառայության մեջ, այլև աշխատում էր հայ եկեղեցու կարևորությունը նշել։

Դրասխանակերտցուն հակառակ, դեպքերին գրեթե ժամանակակից Սեբեոսը Հովհան հակաթոռ Բագարանցուն ներկայացնում է իբրև քաղկեդոնական։ Նա գրում է. «Բաժանեցաւ ապա և Աթոռ կաթողիկոսութեանն յերկուս. անուն միոյն Մովսէս. և միւսոյն՝ Յովհան։ Մովսէս ի պարսից կողմանէ, և Յովհան՝ Յունաց։

Եւ Յովհան ընդ նոսա (ընդ յոյնս—Կ. Ղ.) հաղորդեալ միաւորեցաւ, բայց Մովսէս ամենեին ոչ լինէր ի նոսա հուպ»⁹։

Գրեթե նույնն է ասում X դարի պատմիչ Ուխտանես եպիսկոպոսը։ Նա գրում է. «...ի բառնալ թագաւորութեանն հայոց բաժանեալ եղև աշխարհս մեր ի

6 «Յովհաննու կաթողիկոսի Դրասխանակերտեցոյ պատմութիւն հայոց», էջ 73։

7 «Մեծին Վարդանայ Բարձրբերդեցոյ պատմութիւն Տիեզերական», Մոսկվա, 1861. էջ 34։

8 Դրասխանակերտցի, էջ 71։

9 Սեբեոս, էջ 84։

մէջ հոռոմոց և պարսից. և նստուցին կողմն հոռոմոց հակառակաթոռ Մովսիսի զԹՀան ոմն երկաբնակ, որ ոչ համարեցաւ ի թիւ հայրապետացն հայոց: Որ ապա և յետոյ Աբրահամու եղև հակառակ»¹⁰:

Մաղաքիա Օրմանյանն էլ այն համոզման է, որ Հովհան Բագարանցին քաղկեդոնական է եղել: Մեջ բերելով Դրասխանակերտցու և Վարդանի կարծիքներն այն մասին, որ Հովհանը քաղկեդոնական չի եղել, նա գրում է. «Արդ, ինչպե՞ս ընդունիլ որ հակաքաղկեդոնիկ մնացող մը՝ կրցած ըլլա Մորիկի պաշտպանությունը վայելել: Որչափ ալ կարևոր ըլլա պատմաբանին (Դրասխանակերտցու — Կ. Ղ.) վկայության կշիռը, մենք պիտի պնդենք Յովհան Բագարանցին քաղկեդոնական դավանության համակերպող և հետևող մը ըսել, մեզի հիմ ունենալով Սեբեոսի վկայությունը, թէ Յովհանն ընդ նոսա, այսինքն ընդ հույնս, հաղորդեալ միաւորեցաւ»¹¹:

Ասողիկն էլ գրում է, որ Մորիկն է Հովհան Բագարանցուն կաթողիկոս կարգել հունական մասի վրա. «Իսկ կայսր Մորիկ յՅովհան ոմն նստուցանէ կաթողիկոս մասինն Յունաց. և Աբրահամ նստէր ի Դուին»¹²:

Ավանի հակաթոռ կաթողիկոսության հիմնադրման մասին Դրասխանակերտցին տալիս է մանրամասն տեղեկություն: Նա գրում է. «Յետ այսորիկ ըստ հրամանի կայսերն Մօրկայ զՅոհան ոմն ի գաւառէ Կոգայ ի Բագարան գեղջէ կացուցանեն կաթողիկոս Յունական կողմանն՝ բնակեցուցանելով գնա ի քաղաքադիւղն Աւան, ուր և շինեացն իսկ ինքնին Յոհան գալայծառակերտ քաւարանն սուրբ և շուրջանակի նորա յարդարեաց կալուածս կայանի իւրոյ: Իսկ մեծ հայրապետն Աբրահամ ըստ նախասաց բանին ի Դուին քաղաքի բնակէր ի Պարսից բաժնի անդ. վասն զի գետն Ազատ սահման բաժնիցն երկոցունք ընդ մէջ հատանէր»¹³:

Այսպիսով տեսնում ենք, որ Ավանի տաճարը կառուցել է Հովհան Բագարանցին «և շուրջանակի նորա յարդարեաց կալուածս կայանի իւրոյ»:

Այստեղ կալուածք կայանի իւրոյ, որ եկեղեցու շրջապատում հարդարել է Հովհան հակաթոռը, պետք է հասկանալ այն հմաստով, որ նա եկեղեցու շրջապատում կառուցել է իր կաթողիկոսարանը (իր կայանը) և նրա հարակից շենքերը՝ միաբանների բնակարանները և այլն, որոնք իրոք գոյություն ունեն տաճարի հյուսիսային և մյուս կողմերում: Այդ շենքերի մասին այստեղ բրոշակի բան չենք կարող ասել, որովհետև մասնակի պեղումները, որոնք կատարվել են մինչև այժմ, զլխավորապես նպատակ են ունեցել ոչ թե կաթողիկոսարանի և պալատական շենքերի ավերակների բացահայտումը, այլ բուն տաճարի ներսը և արտաքին պատերը փլատակումներից գոյացած քարակույտներից և հողի շերտերից մաքրելու: Այդ պեղումները կատարվել են նաև պատերից ընկած քարերը պահելու և իրենց տեղում վերաշարելու նպատակով: Հողային այդ աշխատանքների ընթացքում ի հայտ են եկել տաճարի շրջապատում կառուցված շենքերի պատեր՝ տարբեր բարձրությամբ պահպանված, որոնց մասին կարելի է խոսել միայն այն ժամանակ, երբ այդ շենքերը բացելու նպատակով այնտեղ հատուկ պեղումներ կատարվեն: Բայց շենքերի ավերակներ-

¹⁰ Ուխտանէս Եպիսկոպոս, Պատմութիւն հայոց, Վաղարշապատ, 1871, էջ 63:

¹¹ «Ազգապատում», գրեթե Մաղաքիա արքեպ. Օրմանյան, Կ. Պոլիս, 1909, հատ. Ա, էջ 579:

¹² Ասողիկ, էջ 86:

¹³ Դրասխանակերտցի, էջ 72—73:

որ կան և Դրասխանակերտցին, իբրև ականատես, միայն մի երկու բառով է հիշատակել այդ մասին, մեծ կարևորություն չտալով այդ խնդրին:

Անկախ պատմագիրների հիշատակությունից, պետք է համոզված ասենք, որ կաթողիկոսանիստ տաճարը չէր կարող շունենալ հարակից շենքեր, որոնց մեջ կարևոր տեղ էին գրավելու վեհարանը, միաբանների բնակարանները, կաթողիկոսական դիվանը, մատենադարանը, դպրոցական շենքը, ինչպես նաև տնտեսական բնույթի կառուցվածքները՝ ամբար, պահեստ, մառան, աղբյուր:

Բացի արևելյան կողմից, եկեղեցին դեռ այժմ էլ շրջապատված է շենքերի ավերակներով: Եկեղեցու արևելյան հիմնապատերը գտնվում են բավականին խորն ընկած գյուղական ճանապարհի եզրին և եթե այդ կողմում եկեղեցուն կից շենքեր գոյություն ունեցած լինեին, նրանց հետքն անգամ մնացած չէր լինի տեղում, բայց այդ կողմում, որ հավատացյալներն անվանում են աղոթարան, հավանաբար եկեղեցուն կից ոչ մի շինություն գոյություն չի ունեցել, որովհետև, ըստ սովորության, ավագ խորանի ետևը որևէ կառուցում չէին անում, որպեսզի արևի ճառագայթներն անարգել թափանցեն եկեղեցու մեջ: արևելյան լուսամուտներից, իսկ դրա համար անհրաժեշտ էր որոշ ազատ տարածություն:

Ճիշտ է, ավելի ուշ դարերում եկեղեցիներն ունենում էին ժամատներ և այլ կից շինություններ, բայց VI և VII դարերում դեռևս այդպիսի շենքեր չէին կառուցում: Տաճարի մյուս երեք կողմերում կան իլատակված շենքերի հիմնապատերի մնացորդներ և քարակույտեր, բայց դրանց մի մասը առաջացել է տաճարից ավելի վաղ ժամանակներում շինված շենքերից:

Եկեղեցու արևմտյան պատին զուգահեռ ի հայտ եկած երկարաձիգ եռաստիճան հիմնապատը և մի քանի քանդակազարդ բեկորներ ցույց են տալիս, որ այդտեղ գոյություն են ունեցել ավելի հին, հավանաբար IV—V դարերում կառուցված շենքեր և Հովհան Բագարանցին իր աթոռը հիմնադրել է ոչ թե ամայի վայրում, այլ ինչ որ հին շինությունների տեղում:

Ինչպես երևում է, տաճարի տեղի ընտրությանը Բագարանցին մեծ նշանակություն է տվել:

Բյուզանդական մասի սահմանազլխին հակաթոռ կաթողիկոսություն հիմնելն անհրաժեշտ է եղել Դվինի աթոռի դեմ մոտիկից պայքարելու համար: Կարծում ենք այդ իմաստով պետք է հասկանալ Դրասխանակերտցու այն խոսքերը, թե այդ երկու կաթողիկոսությունները «հակաթոռ գոլով՝ յերկուս հատուածս ճեղքեսլ լինէր միատարր միութիւն հայրապետական աթոռոյն, և ապա ոչ սակաւ հակառակութիւն կրեսլ լինէին կողմանքն երկոքին»¹⁴:

Կարևոր էր նաև տաճարի կառուցման կետի ընտրությունը:

Ժողովրդի աչքում Հովհանի կառուցած տաճարը արժեք կունենար միայն այն դեպքում, եթե նա հիմնադրվեր նախապես ճանաչված սրբավայրում: Այդ է պատճառը, որ Բագարանցին շրջապատի ազատ տարածությունները թողած իր եկեղեցին կառուցել է խոշոր շինությունների տեղում, որոնք անշուշտ կրօնական նշանավոր շենքեր են եղել:

Դժբախտաբար Ավանի այսօրվա բնակիչները բնիկ տեղացիներ չեն և հին տաճարի վերաբերյալ տեղական ավանդությանը ծանոթ չեն, նույնիսկ տաճարի բուն անունը նրանց հայտնի չէ:

¹⁴ Դրասխանակերտցի, էջ 73:

Այսօրվա ավանդիները, ինչպես հաղորդում է Թորամանյանը, հարկավ, այդ մասին տեղեկանալով շրջապատի բնակչությանից, զաղթել են Պարսկաստանից Պասկելիչի պատերազմի (1826—1828 թթ.) ժամանակ, հաղիվ 15—20 տուն։ Նրանց գալու օրերին Ավանի տաճարը ավերակ է եղել և կոչվել է Միւրա-նավու (որ Վստվածամոր ածականներից մեկն է)։ Թորամանյանն իր այդ տեղեկությունները գրի է առել 1909 թ., ճամփորդական օրագրի մեջ¹⁵։

Հովհաննես եպ. Շահխաթունյանցը 1842 թ. հրատարակած աշխատության մեջ հաղորդում է, որ Ավան գյուղն ունի ընդամենը 18 տուն բնակիչ¹⁶, իսկ Ղևոնդ Ալիշանի տվյալներով 1873 թ. Ավանն ունեցել է 50 տուն, 316 երկսեռ բնակիչով¹⁷։ 1931 թ. մարդահամարի համաձայն Ավանում ընտանիքների թիվը հասել էր 335-ի, իսկ բնակչությանը՝ 954-ի¹⁸։ Այժմ Ավանը Երևան քաղաքի թաղամասերից մեկն է և մտնում է Մյասիկյանի շրջանի մեջ։

Հիմա աշխատենք պարզել, թե ե՞րբ է կառուցվել Ավանի տաճարը։ Դա ունի մեծ կարևորություն, որովհետև այդ տաճարով հիմք է դրվել մի նոր ոճի, որը հայկական երևույթ լինելով, տարածվեց նաև հարևան երկրներում։

Ավանի տաճարը կառուցման արձանագրություն այժմ չունի։

Ընդհանրապես VI և VII դարերի հայոց եկեղեցիներն ունենում էին կառուցման վերաբերյալ արձանագրություն, որոնք զրված էին լինում կամ մի տողով, պատերի ամրոջ երկարությամբ և կամ մի որևէ ամփոփ տեղում մի քանի տողով։ Կառուցման միատող արձանագրությունները փորագրվել են միայն VI և VII դդ. տաճարների վրա։ Հետագայում բոլորովին չկան այդպիսի արձանագրություններ։ Սովորաբար նրանք սկսվում են տաճարի հարավային պատի սկզբին, շարունակվում են մյուս կողմերում և վերջանում այնտեղ, որտեղ ավարտվում է նրանց գրությունը։

Ավանի տաճարը կառուցման միատող արձանագրություն չի ունեցել։ Եթե այդպիսի արձանագրություն եղած լիներ, նրա որոշ մասերը պետք է պահպանված լինեին հարավային, ինչպես նաև հյուսիսային պատերին, որոնք պահպանվել են եթե ոչ լրիվ, գոնե այն չափով, որ եթե այնտեղ այդպիսի արձանագրություն եղած լիներ, նրա մասերը պետք է մնացած լինեին տեղում և արձանագրած քարերից մի քանիսն էլ պետք է ի հայտ գային տաճարի շրջապատի պեղումների ժամանակ։

Ավան գյուղը հնուց ի վե՞ր հայտնի է եղել տուֆի հարուստ քարհանքերով. այգտեղի քարերով էլ կառուցվել են գյուղի և մերձակա բնակավայրերի միջնադարյան բոլոր հուշարձանները։ Տաճարի մեջ և նրա շրջապատում պատերից ընկած քարերը տեղի բնակիչները շեն տարել և օգտագործել իրենց տնտեսության մեջ։

Ավանցիք եկեղեցու ավերակների քարերին ձեռք չեն տվել ոչ միայն այն պատճառով, որ տաճարը համարել են սրբություն, որի քարերն օգտագործելու դեպքում կարող էր վնաս հասնել իրենց կյանքին և զույթին, այլև այն պատ-

¹⁵ Թորոմանյան, Նյութեր հայկական հարտարապետության պատմության, Աշխատությունների երկրորդ ժողովածու, Երևան, 1948, էջ 161։

¹⁶ Հովհաննես եպ. Շահխաթունյանց, Ստորագրություն կաթողիկե Էջմիածին և հինգ զավատացն Արարատա, էջմ., 1842, Բ հատ., էջ 160։

¹⁷ Հ. Ղևոնդ Ալիշան, Այրարատ, բնաշխարհ ճալատանեայց, Վենետիկ, 1890, էջ 285։

¹⁸ «ՀՊՈՀ Բնակավայրերն ու աղգարնակությունք», Երևան, 1936, էջ 38։

ճառով, որ ավելի ձեռնտու էր նոր քար կտրել իրենց տանն ավելի մոտ գտնվող քարհանքից, քան թե պեղմամբ փլատակների տակից դուրս հանել հարյուրավոր տարիներ արևի տակ կարծրացած հուշարձանի քարերը:

Ամենայն հավանականությամբ Ավանի տաճարն սկզբնապես ունեցել է կառուցման արձանագրություն՝ քանդակված պատերից մեկի արտաքին լրեսին:

Այդ արձանագրությունը չէր կարող գրված լինել արևմտյան պատին, որովհետև մինչև օրս նա կանգուն է իր քարերով վերաշարված վիճակում և նրա վրա կան մի քանի ընդարձակ արձանագրություններ պատի տարբեր մասերում: Եթե կառուցման արձանագրություն լիներ, նա անպայման մնացած կլիներ տեղում, ինչպես մնացել են մյուսները:

Արձանագրությունը չի եղել նաև հյուսիսային կամ հարավային պատերին, որոնց վրա առհասարակ արձանագրություններ չկան և այդ երկու կողմերից տաճարը շրջապատված լինելով դանազան շինություններով, արձանագրությունը տեսնելու և ընթերցելու տեսադաշտ չի ունեցել:

Մնում է ենթադրել, որ կառուցման արձանագրությունը, եթե նա գոյություն է ունեցել, գրված է եղել արևելյան պատին, եկեղեցու արտաքին հրեսին: Չմոռանանք հիշել, որ եկեղեցու բոլոր հնագույն արձանագրությունները գրված են եղել այդ պատին, որոնց թվում նաև Եղր կաթողիկոսի դավանափոխության առթիվ պեղմամբ ի հայտ եկած արձանագրությունը, այն էլ ծածկագրած վիճակում, գրված 630-ական թթ. սկզբին¹⁹:

Կառուցման արձանագրության բացակայության պատճառով տաճարի շինության թվականը որոշելու ենք ճարտարապետական առանձնահատկությունների և մատենագրական տվյալների հիման վրա, հաշվի առնելով նաև ուսումնասիրողների կարծիքները:

Ավանի տաճարի կառուցման վերաբերյալ գլխավոր աղբյուրը Սերեոսի պատմությունն է, որ գրեթե ժամանակակից է և հետագայի պատմիչները մեծ մասամբ նրանից են քաղել իրենց տեղեկությունները:

Այս հարցի համար կարևոր է նաև «Իիրք թղթոցը», որ դարձյալ ժամանակակից աղբյուր է և իր էջերում պարունակում է բազմաթիվ տեղեկություններ հայ-բյուզանդական դավանաբանական հարաբերությունների և վեճերի վերաբերյալ:

Սերեոսը տեղեկություններ է հաղորդում Ավանի աթոռի հիմնադրման վերաբերյալ, իսկ տաճարի կառուցման մասին խոսում է միայն Հովհան Բագարանցու մարմինն այնտեղ թաղելու կապակցությամբ, ավելացնելով, որ Պարսկաստանում մեռնելուց հետո «բերաւ մարմին նորա ի գեղն Աւան՝ յեկեղեցին. Կոր ինքն շինեաց»²⁰:

Հովհանի մահը տեղի է ունեցել պարսից խոսրով Փարվեզի գահակալության 21-րդ տարում. նա գահակալել է 590 թ., հետևապես Հովհան Բագարանցու մահը տեղի է ունեցել 610/611 թթ.:

Պարսիկների վրեժխնդրությունից վախենալով, իր մահվանից տարիներ առաջ, Հովհան Բագարանցին փախել էր Կարին, իսկ այնտեղից էլ գերի էր տարվել Պարսկաստան Կարնո բնակչության հետ միասին, երբ պարսիկներն

¹⁹ Կ ար ո Ղ ա Ֆ ա դ ար յ ա ն, Ավանի երկնզվյան ծածկագիր արձանագրությունը. Երևան, 1945, էջ 5:

²⁰ Ս ե ռ ե ո ս, էջ 123—124:

իրենց հետ տարան նաև ապահովության համար Կարին տարած հայոց եկեղեցու գանձերը: Պարսիկ զորավար Աշոտը ոչ թե պատերազմից անմիջապես հետո գերի տարավ կաթողիկոսին դեպի Պարսկաստան, այլ մի երկու տարի հետո: Դրասխանակերտցու ասելով՝ «Իսկ Աշոտ ոմն հրամանաւ Խոսրովայ հասեալ ի Հայս և դիմեալ ի Վերայ՝ խորտակէր զգօրսն Յունաց, զի ոչ լինէր թիւ սպանելոցն ի դաշտին, և ինքն կալեալ զգործ պատերազմի ընդ Կարնոյ քաղաքի՝ առնոյր զնա: Եւ յետ երկեամ մի ամաց զբնակիչս քաղաքին յԱհմասւան փոխէ: Եւ վասն զի ծերունի կաթողիկոսն Յոհան կայր ի փախստականութեան՝ վարեալ ի գերութիւն և անդէն վախճանեալ՝ բերաւ ի գիւղն Աւան, որ եղաւ մերձ յեկեղեցին, զոր իւր իսկ էր շինեալ»²¹:

Նշանակում է, Հովհանը գերեվարությունից առաջ երկու տարի էլ Կարինում մնացել է պարսկական իշխանության ներքո: Եթե Հովհանի մահը տեղի է ունեցել 610/611 թթ. և նախքան այդ էլ նա երկու տարի Կարինում մնացած է եղել պարսիկների հաղթանակից հետո, և որոշ ժամանակ էլ մինչև իր մահը ապրել է պարսկական գերության մեջ, ուստի Հովհան Բագարանցու փախուստն Ավանից դնելու ենք 608/609 թթ. առաջ:

Այստեղ պետք է հաշվի առնենք մի հանգամանք ևս: Այդ այն է, որ մեր մատենագիրներից ոմանց ասելով (Ասողիկ, էջ 86, Դրասխանակերտցի, էջ 72) Հովհանը ժամանակակից է եղել Աբրահամ կաթողիկոսին և պայքարել է նրա դմ, իսկ Աբրահամը, ինչպես հայտնի է, կաթողիկոս է ձեռնադրվել 607 թ.: Նշանակում է 607 թ. Հովհանը եղել է դեռևս Ավանում:

Աբրահամ կաթողիկոսի առաջին դործերից մեկը լինում է բյուզանդական իշխանության տակ անցած հայ հոգևորականների և իշխանների մասնակցությամբ հրալիրված ժողովը «Եթն ու տասներորդ ամի Ապերուեղ Խոսրովու արքայից արքայի», որ համապատասխանում է մեր 607 թ.: Այդ ժողովի վերաբերյալ փաստավորվի մեջ, որ վերնագրված է «Ձեռնարկ՝ զոր էտուն Աբրահամու հայոց կաթողիկոսի ի միաւորութեանն աշխարհիս հայոց, այնոքիկ որ էին ընդ իշխանութեամբ Հոռոմոց ի թագաւորութեանն Մարկան», հիշատակված են մասնակցողներից շատերի անունները: Առաջնորդ եպիսկոպոսներից հետո թվարկված են մեծ իշխանները, որոնց հաջորդում են դարձյալ մի խումբ եպիսկոպոսներ, հավանաբար երկրորդական կարգի, որոնցից հետո գալիս են վանքերի երեցները: Այս խմբի մեջ հիշատակված է Ավանի վանքի երեց Հունանհուր, որի անունը հանդես է գալիս էջմիածնի (որ «Ձեռնարկի» մեջ «սրբոյ կաթողիկէ» է կոչված)²², Հոիփսիմեի, Հովհաննավանքի, Օշականի, Եղվարդի

²¹ Դրասխանակերտցի, էջ 73—74:

²² 607 թ., երբ գումարվել է այդ ժողովը, հայոց կաթողիկե եկեղեցին Դվինի մայր տաճարն էր, որն այդ նույն թվականին հայոց մարզպան Սմբատ Բագրատունին վերակառուցեց և նախկին անգմբեթ եռանավ բազիլիկ եկեղեցին վերածեց շեշտված կողմնային աբսիդներ ունեցող խաչաձև տաճարի, որի նորակառույց հսկայական գմբեթը պահվում էր զահլիճի կենտրոնում քարձրացող չորս մույթների վրա:

«Ձեռնարկի» մեջ էջմիածնի անունը չի տված, բայց հասկանալի է, որ սուրբ կաթողիկե-ն Դվինի մայր տաճարը չէր, որովհետև նա Հայաստանի պարսկական մասում էր գտնվում, իսկ ժողովին մասնակցում էին (բացի մարզպան Սմբատ Բագրատունուց և Աբրահամ կաթողիկոսից, որ ժողովի կազմակերպիչներն էին) միայն Հայաստանի հունական մասի հոգևոր և աշխարհիկ իշխանները: Բացի այդ, հայտնի է, որ կաթողիկոսանիստ վայրի եկեղեցին վանքերից չի ունենում, այլ միայն եկեղեցապաճ:

Աբրահամ կաթողիկոսը «Ձեռնարկի» մեջ էջմիածինը, հին սովորության համաձայն, անվանել է կաթողիկե:

(գովում է Աղիվարդայ), Երևանի երեցներից հետո և Պտղավանքի ու Երևանի մի այլ երեցից առաջ։

Որ Երևանից այդ «Ձեռնարկին» մասնակցել են երկու վաներեցներ, մեկը՝ Դավիթ անունով, մյուսը՝ Զոչիկ, ասպացույց է այն բանի, որ նա բավականին մեծ բնակավայր է եղել։ Անշուշտ այդ երեցներից մեկը Պողոս-Պետրոսի քահանան է եղել, իսկ մյուսը՝ 1679 թ. կործանիչ երկրաշարժի ժամանակ փլատակված հին տաճարներից մեկինը։

Ավան բառն, ինչպես հայտնի է, իբրև հասարակ անուն գործ է ածվում քաղաքատիպ փոքրիկ բնակավայրերի համար, բայց իբրև տեղանուն Հայաստանում հայտնի է մի քանի վայրերում։ Սակայն Աբրահամ կաթողիկոսի «Ձեռնարկի» մեջ հիշատակված Ավանը Կոտայքի գավառի Ավան գյուղաքաղաքն է։ Այդ երևում է նրանից, որ Ավանից առաջ և նրանից հետո հիշատակված են նրա մերձակայքում գտնվող վանքերը²³։ Հետաքրքիրն այն է, որ «Ձեռնարկի» մեջ ոչ մի խոսք չկա Ավանի կաթողիկոսության մասին ոչ մասնակցողների կազմում և ո՛չ էլ նդովքի ենթարկված հերձվածողների թվում։ «Ձեռնարկին» մասնակցող բոլոր անձնավորությունները նդովել են «զամենայն հերձուածողս», որոնց թվում՝ «զԱրիոս, և զՄակեդոն, և զՆեստոր, և զԵւտիքոս, և զչար ժողովն Քաղկեդոնի, և պիղծ տումարն Լևոնի» և բոլորը միավորված ընդունել են այն ամենը, ինչ որ սահմանել են հայոց եկեղեցու երանելի հայրերը։ Խոստացել են անշարժ պահել հայոց ավանդական եկեղեցին և հաղորդություն շունենալ բյուզանդականի հետ²⁴։ Հակաքաղկեդոնական բնույթի այսպիսի համարձակ որոշում կայացնելուն նպաստել է Սմբատ Բագրատունու ներկայությունը, և այն, որ այդ ժամանակ պարսիկները քաղաքական կյանքում որոշ առավելության էին հասել և վտանգ կար պարսկական հարձակումների։

Կարծում ենք հենց այդ տարին էլ (607 թ.) Հովհանն փախել էր Կարին և դրանով իսկ վերջացել էր նրա հակաթոռ կաթողիկոսությունը։

Աբրահամ կաթողիկոսի «Ձեռնարկին» մասնակցած Հունանեսը ներկայացել է Դվինի ժողովին ոչ թե իբրև հակաթոռ կաթողիկոսի ներկայացուցիչ, այլ իբրև վանքի երեց, իսկ այդ նշանակում է, որ այդ կաթողիկոսությունն այլևս պոչություն չուներ, իսկ Հովհանին, որ Կարնո քաղաքում էր ասպատանել, Ավանում այլևս կաթողիկոս չէին համարում։ Նորրոտիր Աբրահամ կաթողիկոսի հրավիրած ժողովին մասնակցել են Արարատյան նահանգի բյուզանդական մասի հոգևորական դասի ներկայացուցիչներից շատերը։ Հովհանն ինչքան էլ որ ուզենար թաքցնել իր աթոռի քաղկեդոնական բնույթը և վաշելք բյուզանդական կայսրության ջերմ աջակցությունը, երբեք հայ հոգևորականության և ժողովրդի վստահության չէր արժանանա։

Կարելի էր ենթադրել, որ Հունանեսը Ավանի մի այլ եկեղեցու վաներեցն է եղել, մանավանդ որ Ավանում կան ևս երկու փոքրիկ եկեղեցիներ, որոնք այժմ կիսակործան վիճակի մեջ են գտնվում։ Թորոս Թորամանյանի կարծիքով այդ երկուսն էլ կառուցված են X—XIII դարերում²⁵։ Դրանցից մեկը, որ Սուրբ

²³ Ավան անվամբ գյուղ կա նաև Աշտարակի շրջանում, բայց նա նոր գյուղ է և հնում գոյություն չի ունեցել։

²⁴ «Գիրք թղթոց», Թիֆլիս, 1901, էջ 151։

²⁵ Մի այլ տեղում Թորամանյանն այդ երկու մատուռների կառուցումը վերագրել է XIII—XIV դարերին։ Նա նշել է, որ Ավանում «Կան նաև ուրիշ եկեղեցիների կիսականգուն մնացորդներ, հավանաբար XIII—XIV դարերի» (Թորամանյան, Նյութեր հայ ճարտարապետության պատմության, Աշխատությունների երկրորդ ժողովածու, էջ 119)։

Հովհաննես է կոչվում ըստ արձանագրության, շրջապատում ունի տապանաքարեր և մի մահարձան, որ հին է և կարող է պատկանել VI—VII դարերին: Այս մահարձանի վրա ուղադրություն է դարձրել նաև Թորամանյանը և գրել է, որ Հովհաննես կոչվող հետադարյան մատուռի «մոտին կա մի մահարձան հներինման, մի կողմը երկրաչափական դարդեր. Բ և Դ երեսներին մուլյուրներ, իսկ Դ երեսին ոչինչ չունի»²⁶:

Ս. Հովհաննես մատուռը փոքրիկ շինություն է, չէր կարող առանձին միաբանություն ունենալ և բացի այդ նա կառուցված է X դարից ոչ շուտ: Հետևապես Հունանեսը չէր կարող այդտեղի վաներեցը լինել: Մահարձանը հին է, բայց կապ չունի մի քանի դար հետո կառուցված եկեղեցու հետ:

Հայտնի է, որ Հովհան Բագարանցին Մովսեսի մահվանից հետո, Վրթանես քերթողի տեղապահության տարիներին (604—607) մեծ պայքար էր ծավալել Դվինի աթոռի դեմ և նա էր, որ 606 թ. խանգարեց կաթողիկոսի ընտրությանը, երբ այդ նպատակով Հայաստանի հունաց և պարսից մասերի հոգևորականներն ու իշխանները հավաքվել էին Դվինում. ինչպես Ստեփանոս Օրբելյանն է գրում, կաթողիկոսի ընտրությունը «ոչ հաջողեցաւ այն անգամ»²⁷:

Սակայն հաջորդ տարին վիճակը փոխվեց: Սմբատ Բագրատունին, Պարսկաստանում բազմաթիվ քաջագործություններ անելուց հետո, խոսքով Փարվելի 17-րդ տարում, այսինքն 607 թ. գալիս է Հայաստան առաջին հերթին հայոց եկեղեցու գործերը կարգավորելու և, կարծում ենք, այդ է պատճառը, որ նա անմիջապես ձեռնամուխ եղավ կաթողիկոսական ընտրության: Ընտրությանը Ռշտունյաց արքեպիսկոպոս Աբրահամին հայոց կաթողիկոս նստեցրեց, և կսեց մայր եկեղեցու վերակառուցումը, Դվինում հրավիրեց Հայաստանի Բյուզանդիային անցած մասի հոգևոր պետերի և աշխարհիկ իշխանների ժողով՝ եկեղեցու միավորման նպատակով: Այդ նույն միջոցին էր, որ Հովհան Բագարանցին փախավ Կարին և լքեց իր աթոռը: Դժվար չէ կռահել, որ այդ փախուստը կապված է եղել Սմբատ Բագրատունու գործունեության հետ:

Մեր մատենագիրներից Երկուսը՝ Դրասխանակերտցին և Ասողիկը թվական տվյալներ ունեն Հովհան Բագարանցու կաթողիկոսության տևողության վերաբերյալ, բայց նրանց թվերի մեջ տասը տարվա տարբերություն կա: Դրասխանակերտցին գրում է, որ Հովհանը վախճանվեց «կալեալ զաթոռ հայրապետության ամս Իգ», այսինքն 26, զրան հակառակ Ասողիկը տեղեկացնում է, որ Հովհանը «Կալաւ զաթոռն ամս 16»: Տասը տարվա տարբերությունը, անշուշտ, հետևանք է դրչագրական սխալի և ոչ թե մատենադրական տարբերության և անկասկած է, որ ճիշտն Ասողիկն է: Այդ դրչասխալը, ըստ երևույթին, սուղաջացել է շատ հնում, քանի որ XIII դարի մի քանի մատենագիրներ կրկնել են այն իրենց գործերում (Կիրակոս Գանձակեցի, Վարդան): Ասողիկի վկայությամբ Հովհան Բագարանցու կաթողիկոսությունը հասնում է մինչև 607 թ., որ ինչպես տեսանք, հաստատվում է այլ տվյալներով ևս, իսկ եթե ընդունելու լինենք Դրասխանակերտցու առաջարկած թվականը, Հովհանի կաթողիկոսությունը բերելու և հասցնելու ենք մինչև 617 թ., որ բոլորովին չի համապատասխանում այդ ժամանակների պատմական անցքերին:

²⁶ Թորամանյան, նշվ. աշխ., հատ. Բ, էջ 119.

²⁷ Ստեփանոս Օրբելյան, նշվ. աշխ., էջ 98.

Հովհան Բագարանցու ժամանակի վերաբերյալ բոլորովին սխալ տեղեկություն է տալիս XIII դարի պատմիչ Կիրակոս Գանձակեցին։ Հակառակ դեպքերին ժամանակակից Սեբեոսի, որը Հովհան հակաթոռին իրավացիորեն համարում է Մովսես Եղվարդեցու (574—604) ժամանակակից, ասելով՝ «Բաժանեցաւ ապա և աթոռ կաթողիկոսութեանն յերկուսս. անուն միոյն Մովսէս, և միւսոյն՝ Յոհան։ Մովսէս ի Պարսից կողմանէ, և Յոհան՝ Յունաց»²⁸, Կիրակոս Գանձակեցին Հովհանին համարում է Աբրահամ Աղբաթանեցու հաջորդ։ Նա գրում է. «Եւ յետ տեառն Աբրահամու առնու զկաթողիկոսութիւնն տէր Յոհան, ի Կոզովտէ, ի գեղջէ Բագրանէ, ամս քսան և վեց. ոմանք ի պատմագրաց զերկոսեանն ի միում ամի ասեն վախճանեալ զԱբրահամ և զՅոհան, և կէսքն՝ ոչ»²⁹. Գանձակեցու դրածի անճշտությունը հայտնի է դառնում թեկուզ միայն նրանով, որ, ինչպես հայտնի է, Աբրահամը կաթողիկոս է եղել 607 թ. մինչև 615-ը, երբ Մորիկ կայսրը վաղուց արդեն վախճանվել էր (նրան սպանել են 602 թ.), հետևապես նա չէր կարող իր մահվանից հետո հակաթոռ կաթողիկոսություն ստեղծել Ավանում։ Եթե Գանձակեցուն հավատանք, Հովհանը կաթողիկոս է եղել 26 տարի և հաջորդել է Աբրահամին, նշանակում է նրա կաթողիկոսությունը հասել է մինչև 640-ական թթ., որ բացարձակ սխալ է։ Այդ ժամանակամիջոցում, ինչպես հայտնի է, կաթողիկոս են եղել Կոմիտաս Աղեցեցին (615—628), Քրիստափոր Ապահունին (628—630), Եղրը (630—641)։ Գանձակեցու այս սխալը առաջ է եկել այն բանից, որ նա Հովհան Բագարանցուն դրել է հայոց կաթողիկոսների շարքի մեջ, առանց ուշք դարձնելու, որ նա հակաթոռ է եղել և չի հաջորդել կամ նախորդել հայոց կաթողիկոսներից և ոչ մեկին։

Այս բոլորից եզրակացնում ենք, որ Հովհանի փախուստը դեպի Կարին տեղի է ունեցել 607 թ. և դրանով էլ վերացել է Մորիկ կայսեր հիմնած Ավանի հակաթոռ կաթողիկոսությունը։

Եթե 607 թ. Հովհանն իր աթոռի վրա լինել և իշխանություն ունենար Հայաստանի բյուզանդական մասի եկեղեցիների վրա, նա չէր թույլ տա, որ իր իշխանության ներքո գտնվող հոգևորականները Աբրահամի հրավերով գնային Դվին և այնտեղի աթոռին հավատարմության երդում տային։

Երևի Հովհան հակաթոռի շուտափույթ փախուստն է պատճառը, որ Սիմեոն Երևանցին գրել է. «Տէր Յոհան ի Կոզովտայ, որ ընդ դէմ Աբրահամու նստալ ի Կարին, և մեռաւ յառաջ քան զԱբրահամն։ Սա հետևեցաւ աղանդոյն քաղկեդոնի»³⁰։

Նկատելի է, որ Մորիկ կայսեր սպանությունից հետո (602 թ.), Ավանի կաթողիկոսությունը անկում է ապրել, իսկ Դվինի հայոց կաթողիկոսներն էլ ամեն կերպ աշխատել են մեկուսացնել Ավանը և շրջապատի վանքերն ու բյուզանդական իշխանության տակ գտնվող հոգևորականներին աղատել նրա աղեցությունից։ Հասկանալի է, որ անկման շրջանում չէր կարող կառուցվել Ավանի տաճարը։ Նրա կառուցումը պետք է դնել ավելի առաջ, մինչև Մորիկ կայսեր մահվան թվականը։

²⁸ Ս ե բ ե ո ս, էջ 84։

²⁹ Կ ի ր ա կ ո ս Գ ա ն ձ ա կ ե ջ ի, էջ 50։

³⁰ Ս ի մ ե ո ն կ ա թ. Ե ր և ա ն ջ ի, Ջամբու, դիրք որ կուշի յիշատակարան արձանացուցիչ..., «Ազարշապատ, 1873, էջ 13։

Ավանի տաճարի կառուցման թվականի մասին հայ և օտար գիտնականները հայտնել են ինչ որ չափով տարբեր կարծիքներ, որոնց զանազանությունը տասնյակ և ավելի տարիների է հասնում:

Ինչպես հին մատենագիրները, այնպես էլ նոր և նորագույն ուսումնասիրողները Ավանի տաճարի կառուցումը կապում են Հովհան հակաթոռի հետ, լայց ուսումնասիրողներից մի քանիսը տաճարի շինությունը վերագրում են Հովհանի գահակալության առաջին տարիներին, VI դարի վերջին տասնամյակին, իսկ ոմանք էլ կառուցման թվականը հետ են բերում մինչև Հովհանի գահակալության վերջին տարին՝ մինչև 609 կամ 611 թթ.:

Թորոս Թորամանյանն իր աշխատությունների մեջ բազմիցս անդրադարձել է Ավանի տաճարին և նշել է կառուցման հավանական թվականները, որ VI դարի վերջն է: Նա գրում է, որ Ավանի տաճարի «շինողն է Հովհան Բաղարանցի հակաթոռ կաթողիկոսը (590—611): Այս եկեղեցին շինել է իբրև կաթողիկոսական եկեղեցի, գահակալության սկզբին՝ VI դարու վերջին: Ինքն այլ թաղված է այս եկեղեցվո մոտ»³¹:

Նիկոլայ Տոկարսկին «Ակնարկներ հայ ճարտարապետության պատմության» գրքում Ավանի տաճարի կառուցված այդ նույն ոճի բոլոր տաճարները (Ավան, Արամուս, Թարգմանշաց վանք, Հոփսիմե, Աղիաման, Սիսավան) վերագրում է VI և VII դարերին և գտնում է, որ նրանց մեջ հնագույնը Ավանի տաճարն է³²: Տոկարսկու գրածից եզրակացնում ենք, որ Ավանի տաճարը նա համարում է կառուցված VI դարում:

Ռուբեն Աղաբաբյանը, որ ուսումնասիրել է Հայաստանի և Վրաստանի պեղված տաճարների կառուցվածքը, Ավանի տաճարի շինության թվականը անորոշ է թողնում՝ հայտարարելով, որ նա կառուցված է Հովհանի կաթողիկոսության տարիներին՝ VI դարի վերջին և VII-ի սկզբներին, մինչև 609 թ., որ համարվել է Հովհանի կաթողիկոսության վերջը³³:

Հոփսիմեի տաճարի վերաբերյալ հատուկ ուսումնասիրության հեղինակ Ալեքսանդրա Նրեմյանը իր աշխատության մեջ քննել է նաև ճարտարապետական նույն ոճն ունեցող հայկական մյուս տաճարները: Նա Ավանի տաճարը համարել է VI դարում կառուցված եկեղեցի: VI դարին է վերագրել նաև Արամուսի նույնատիպ տաճարը³⁴:

Անատոլի Յակոբսոնը Ավանի տաճարը համարում է VI դարի վերջի և VII-ի սկզբի (մինչև 609 թ.) գործ³⁵:

Այդ նույն ժամանակին է վերագրել Ավանը Ստեփան Մնացականյանը³⁶:

Արվեստի պատմաբան Գեորգի Չուբինաշվիլին, որ սովորաբար հայկական միջնադարյան հուշարձանների տարիքը երկու-երեք հարյուրամյակով պակասեցնում է, Ավանի նկատմամբ իր այդ սովորությունը չի կիրառում, այլ հետև-

31 Թորոս Թորամանյան, նշվ. աշխ., հատ. Ա, էջ 245:

32 Н. М. Токареский, Архитектура Армении IV—XIV вв., Ереван, 1966, էջ 121:

33 Р. Я. Агабабян, Композиция купольных сооружений Грузии и Армении, Ереван, 1950, էջ 59:

34 А. Б. Еремян, Храм Рипсимэ, Ереван, 1955, էջ 6 և 91:

35 А. Л. Якобсон, Очерк истории зодчества Армении V—XVII вв., М.—Л., 1950, էջ 19:

36 «Ակնարկ հայ ճարտարապետության պատմության», Երևան, 1964, էջ 146:

վելով ուրիշների օրինակին (Strzygowski) Ավանի տաճարը վերագրել է VI դարի վերջի և VII դ. առաջին տասնամյակներին, բայց ամեն կերպ աշխատել է նսեմացնել տաճարի ճարտարապետական բարեմասնությունները³⁷։ Իր՝ վերջերս հրատարակած հայոց ճարտարապետության վերաբերյալ խոցելի աշխատության մեջ, երբ Ավանի տաճարը համեմատության է դնում Վրաստանի ս. Խաչ (Ջվարի) եկեղեցու հետ, մոռացության է տալիս Ավանի տաճարի կառուցման մասին իր իսկ որոշած և բազմիցս հրատարակած թվականները և ուսենալով նախապատվություն տալ Մցխեթի ս. Խաչին, հայտարարում է, որ վերջինս կառուցվել է VI դարի 90-ական թվականներին, իսկ Ավանի եկեղեցին՝ VII դարի առաջին տասնամյակում³⁸։

Սակայն Մցխեթի ս. Խաչ եկեղեցու հայերեն և վրացերեն կառուցման արձանագրությունը, գրված մի քարի վրա, որ այժմ տեղից հանված պահվում է Վրաստանի թանգարանում, ցույց է տալիս և վկայում, որ այդ եկեղեցին կառուցվել է ոչ թե VI դարի 90-ական թվականներին, ինչպես ենթադրում էր Գեորգի Չուբինաշվիլին, այլ 600—604/5 և 627—642 թթ.՝ տեական ընդմիջումով, այսինքն շատ ավելի ուշ, քան թե կառուցվել է Ավանի տաճարը, այն էլ հայ վարպետների մի մեծ խմբի մասնակցությամբ, որին ղեկավարել է Ատենի ս. Սիոն (Գորի քաղաքի մոտ) նույնատիպ տաճարի կառուցող ճարտարապետ Թոգոսակը³⁹։

Կարծում ենք, որ Ավանի տաճարի կառուցումը որոշակի կերպով պետք է դնել VI դարի մեջ և ոչ թե VII դարի մինչև 9 կամ 11 թվականները, ինչպես այդ անում են ուրիշները։

Հովհանր յոթ տարի Ավանում կաթողիկոսական աթոռի վրա մնաց մինչև 607 թվականը, բայց մինչև այդ նա իր աթոռը վարել էր 590 թ. մինչև դարավերջը՝ 600 թ.։ Պարզ է, որ նա եկեղեցին պետք է կառուցեր ոչ թե իր գահակալության վերջին տարիներին, այլ սկզբին, նույնիսկ ավելի առաջ, քան պահի վրա նստելը, այլապես պետք է ենթադրենք, որ այդ Հովհան հակաթոռն առանց եկեղեցու է սկսել իր գործունեությունը Ավանում։

Հովհանր կաթողիկոսական աթոռը հիմնելուց առաջ պարտավոր էր կատարել որոշ նախապատրաստական աշխատանք։ Նա պետք է ընտրեր աթոռի համար հարմար մի վայր, նշանակեր միաբաններ, լուծեր տնտեսական և այլ հարցեր, կառուցեր եկեղեցի։ Նա այդ բոլորը կատարել էր կաթողիկոս ձեռնադրվելուց առաջ։

Ինչպես Սեբեոսն է հաղորդում, Հովհանր կաթողիկոս է նշանակվել իր ծերության հասակում, երբ նա ճանաչված հոգևորական էր։ Սեբեոսն ասում է՝ «Երանելի ծերունի կաթողիկոսն Հովհան ի գեթութին վարեցաւ»։ Հարց է առաջ գալիս, թե մինչև կաթողիկոս դառնալը որտե՞ղ էր և ի՞նչ էր անում։ Միայն դիտենք, որ նա Կոզովիտ գավառի Բազարան գյուղից էր և հավանաբար այնտեղ էլ հոգևորական էր գարձել։ Պատմիչների ասելով օրինակելի և հեղինակություն ունեցող հոգևորական է եղել։ Անշուշտ կաթողիկոս դառնալուց առաջ նա իր հիմնադրած Ավանի տաճարի վանահայրն է եղել և այդ տաճարը կառուցել է ավելի շուտ, քան կաթողիկոս դառնալը։

37 Г. Н. Чубинашвили, Памятники типа Джвари, Тбилиси, 1967, էջ 37։

38 Его же, Разыскания по армянской архитектуре. Тбилиси, 1967, էջ 37։

39 П. М. Мурадян, Армянская надпись храма Джвари, «Վրաբեր հասարակական դիտողություններ», 1968, № 2 (297), էջ 55—80։

Այդ են ապացուցում Ավանի տաճարի կառուցվածքի մեջ աչքի ընկնող խիստ արխաիկ ձևերը, որոնք շատերին դարձանք են պատճառել: Կամարների պայտաձևությունը, արևմտյան մուտքի ձևավորումը, որի նմանությունը V—VI դարերի տաճարների մուտքերին բազմիցս նշել են ուսումնասիրողները, գմբեթի հիմքի քառակուսուց բազմանկյունու անցնելու եղանակը, պսակները և չատ այլ մանրամասնություններ, որոնք հատուկ են V—VI դարերին և բոլորովին չեն կապվում VII դարի հետ:

Այս բոլորի հիման վրա Ավանի տաճարի կառուցումը վերագրում ենք VI դարի երկրորդ կեսին և ոչ թե նրա վերջին կամ VII դարի սկզբներին:

Ավանի տաճարի կառուցման ժամանակի խնդրին մենք մեծ կարևորություն տվինք այն պատճառով, որ, ինչպես ասել ենք, նրանով հիմք է դրվել շարտարապետական կառուցվածքների մի նոր տիպի, որը հետագայում տարածվեց Հայաստանում և կատարելության հասավ 618 թ. էջմիածնում կառուցված Հռիփսիմեի հորինվածքի մեջ:

Այսօր 2750-ամյա Երևան քաղաքի ծոցում պահվող ճարտարապետական այդ դոհարը խնամքով պահպանվում, վերանորոգվում, բարեկարգվում և բազմակողմանիորեն ուսումնասիրվում է ի փառս հայ ժողովրդի բազմադարյան մշակույթի:

ИСТОРИКО-АРХЕОЛОГИЧЕСКИЕ ЗАМЕТКИ ОБ АВАНСКОМ ХРАМЕ

(К 2750-летию со дня основания Еревана)

Проф. К. Г. КАФАДАРЯН

(Резюме)

На основании фактов и сведений древнеармянских историков автор статьи приходит к заключению, что находящийся в черте современного Еревана Аванский храм построен не в последнем десятилетии VI в. или в начале VII в. н. э., как предполагают исследователи (Т. Тораманян, Ж. Стриговский, Н. М. Токарский, Р. Я. Агабабян, Т. Н. Чубинашвили и др.), а во второй половине VI в., еще до основания Аванского католикосата в 590 г.

Аванская церковь является первым из известных нам образцов нового типа армянских архитектурных сооружений (типа Рипсиме), особенности которого быстро распространились по всей Армении и за ее пределами.